

IN ACHTO ITLAHCUILOLAMATZIN TLEN OQUIMOIHCUILUI IN TETIOTLATITLANIL JUAN

**Itlahtoltzin in Dios quitemaca
nemilistli nochipa**

1 Namechtlahcuiuya teca
in Jesucristo oc se tetoca
Tecualnextzin in Dios aquin
quitemacalo nemilistli nochipa.
Huan Yehhuatzin acho oilohuaya
ihcuac opeu nochin in tlalticpac.
Huan tehhuan titetiotlatitlaniluan
otitecajque huan otiteitaque ica
toixtelolo huan otitemachilihque
ica toman. **2**Huan Yehhuatzin
ohualuilohuac nican tlalticpac
ic mateixmatican huan tehhuan
titetlatitlaniluan otiteitaque, huan
ticchipautoque teca Yehhuatzin.
Huan tamechmatiltiyahque
namehhuan quen Yehhuatzin
quitemacalo nemilistli nochipa.
Oilohuaya teuhan Tohueyitahtzin
huan satepa ohualuilohuac nican
tlalticpac ic matechnextililo.
3Tamechtlapohuiliyahque
tel, in tlen tiquitztoque huan
tlen ticactoque, huan ic inon
matimosetilican quen nochin
tlaneltocanimen mosetilisque
teuhan Dios Tohueyitahtzin huan

teuhan Iconetzin Jesucristo. **4**Ijcon
tel, tamechtlahcuiuyahque inin
cuali tlahtoli ic xipacyetocan.

Dios Yehhuatzin in Tlanextlistli

5Canin tlanesis ica in tonaltzintli
ahmo oncan in tlayohuilotl. Ijcon
campa ilohuac in Dios ahmo
oncan tlahtlacoli tleca Tehhuatzin
tlamelajcan. **6**Tla tiquitosque
timosetilihoque teuhan ihcuac
tinemisque ipan in tlayohuilotl,
ijcon tiistlacatihque ica tlen
tiquihtohuahque huan ica nochin
tlen ticchihuahque. **7**Huan in tla
tinemisque ipan in tlanextli quenin
Dios ilohuac ipan inon tlanextli,
ijcon timosetilisque se huan oc
seya, huan ica in iyestzin Iconetzin
Jesucristo techchipahualos ica
nochin in tlahtlacoli.

8Huan tla tiquitosque ahmo
ticpiyahque tlahtlacoli, san
tehhuan timocahcayahuahque
huan ijcon tiistlacatihque. **9**Huan
tla tictemocuitisque in totlahtlacol,
cuali titetemachisque in Dios quen
Yehhuatzin moyecchihua tlen
tlamelajcan. Techtlapohpoluilos ica

totlahtlacol huan techchipahualos
ica nochin tlen ahmo cuali.

¹⁰Huan tla tiquihtosque ahmo
ticchiutoque tlahtlacoli, san
teca timahuitiyahque huan
tiquihtohuahque mach Yehhuatzin
Dios quistlacatihua. Huan ijcon
tehhuanten ahmo titlamejacenten.

Cristo, Yehhuatzin in Totepalehuihcau

2 Notlasohicnihuan,
namechiluiya inin cuali tlahtoli
ic ahmo xitlahtlacolanacan. Huan
tla seja tlahtlacolana, ticpiyahque
se Totepalehuihcau teixpa
Tohueyitahtzin. Yehhuatzin in
Jesucristo huan ic nele Yehhuatzin
in tlamelajcan. ²Tleca Jesucristo
Yehhuatzin topatlaca quen
otlapanoloc ica tehhuant totlahtlacol,
huan ahmo san ica tohuaxca, in
tlahmo noyojqui ica tlahtlacolten de
nochin tlalticpac tlacamen.

³Huan in tla tictlacamatisque
nochin tetlanahuatiltzin in Dios, ijcon
ticmatihque quen nele titeixmautoque.
⁴Huan tla cana seja quihtos: “Nehhua
no niteixmati”, huan tla cana ahmo
quitlacamati inon tetlanahuatiltzin,
inon se istlacatqui, huan ahmo
tlamelajcan. ⁵In aquin quichihuas
quen Yehhuatzin quimihualuiya,
ic nele tlamelajcan tetlaoshtla in
Dios. Ijconon ticmatihque tehuan
timosetilihtoque. ⁶In aquin
quihtos: “Tehuan nimosetilihtoc
in Dios”, quinequi ijcon manemi
quen onemohuayaya in Totecohtzin
Jesucristo.

In yancuic tlanahuatili

⁷Notlasohicnihuan, ahmo
namechihcuiluihtica se tlanahuatili

yancuic. Yiyejhua quen inon
tlanahuatili tlen yinanquimautoque
hasta mihtos ximotlasohtlacan
se huan oc seja. ⁸Huan inin
tlanahuatili yau mochihua quen
yancuic tlanextilistli tleca yopeu
tlanesi toyolihtec in tlanextilistli
melahuac in tlen yau chipahui ica
in tlayohuilotl. Tla tictlacamatisque
imin tlanahuatili, timemisque
ihtech in yancuic tonali ijcon quen
onemohuac in Cristo.

⁹Tla cana quihtos seja: “Yininemi
ipan in yancuic tonali”, huan
tla quicocoliya se itlacaicniu, oc
nentica ipan inon tlayohuilotl. ¹⁰In
aquin quitlasohtla se itlacaicniu,
yehhua yinentica ipan in yancuic
tonali huan ayacmo motecuiniya
ipan in tlahtlacoli. ¹¹Huan in
aquin quicocoliya se itlacaicniu
oc nentinemti ipan in tlayohuilotl
huan niyan ahmo quimati
canin yau, tleca in tlayohuilotl
quiixpolohtinemi.

¹²Namehhuan cocone,
namechtlahcuiluiya namehhuan
tleca Dios yomechtlapohpoluiloc
ica namotlahtlacol. Ihcuac
omicohuac in Totecohtzin
Jesucristo ijcon omotlaxtlau ica
tehhuant totlahtlacol. ¹³Tetatahmen,
namechtlahcuiluiya namehhuan
tleca yinanteixmautoque in
Jesucristo aquin yonemohuayaya
ihcuac opeu in tlalticpacatl.

Telpopochten, namechtlahcuiluiya
namehhuan tleca yonanquitlanque
ica in ahmo cuali tlacatl.
Namechtlahcuiluihtoc namehhuan,
cocone, tleca yinanteixmautoque
in Tohueyitahtzin.
¹⁴Namechtlahcuiluihtoc

namehhuan, tetatahmen, tleca yinanteixmautoque in Jesucristo aquin yonemohuayaya ihcuac opeu in tlaltipactli. Namechtlahcuiluihtoc noyojqui namehhuan, telpopochten, tleca nanmochicahuahque huan nanquimoyolotiyahque itlahtoltzin in Dios, huan ijcon yonanquitlanque in ahmo cuali tlacatl.

¹⁵Ayacmo xicchihuacan cuenta ica in tlen acho tlanehnehuilistli. Huan ayacmo xicchihuacan cuenta ica tlen san nammohuaxcatiyahque nican tlalticpac. Ijcon ticmatihque tla ticchihuasque cuenta ica inon tlen acho totlanehnehuilis, ayamo melahuac titetlasohtlahque in Tohueyitahtzin. ¹⁶Nochin tlen quichiutaten in aquin ahmo quinehnehuiliyahque, inon ahmo tetlanehnehuilis in Tohueyitahtzin. Quichihuasque san tlen quinequisque, huan quinequisque nochin tlen quitasque, huan mohueyiliyahque ica nochin tlen quipiayahque. Nochin inon den acho tlanehnehuilistli. ¹⁷Huan inon tlen acho tlanehnehuilistli yitlantiu, ihuan nochin in ahmo cuali tlen quihuica. Huan in aquin nochipa tenequi in Dios nemis nochipa.

In tlamelajcan huan in istlacatilistli

¹⁸Notlasohicnihuan, hualahsis in tonali queman nesis in aquin teixnam quis in Cristo, quen namehhuan yinanquicactohque. Quen axan yimonextihtohque miyacten in aquin teixnamiquihque in Cristo. Ic inon ticmatihque quen hualahsis inon tonali. ¹⁹Yehhuan

aquin teixnamiquihque in Cristo omoxelohque den tohuan, huan ahmo tohuan omosetilihque. Tla tohuan yesquiyanihque, ahmo moxelonihque tohuan. Huan quen omoxelohque, ijcon maticmatican ahmo tohuan omosetilihque den acho.

²⁰Huan Yehhuatzin in Cristo Tetlapehpeniltzin in Dios aquin yomechmacaloc namehhuan in Itiotonatzin Dios, huan ic inon nanquimatiyahque tlen tlamelajcan.

²¹Ahmo namechtlahcuiluiya tleca ahmo nanquimatiyahque tlen tlamelajcan. Namechtlahcuiluiya tleca queme yinanquimatiyahque tlen tlamelajcan. Noyojqui yinanquimatiyahque tla tehhuan tiquihtohuahque tlen tlamelajcan, ahmo tiistlacatihque.

²²In aquin quihtohua mach in Jesús ahmo Yehhuatzin in Cristo, Iconetzin in Dios, yeh in aquin istlacatqui. Huan in aquin teixtlatiya in Dios huan Iconetzin, yeh in aquin teixnam quis in Cristo. ²³In aquin teixtlatiya in Iconetzin Dios, yeh in aquin ahmo teneltoca teca Tohueyitahtzin Dios. Huan in aquin techipahua teca Iconetzin noyojqui teneltoca teca Tohueyitahtzin.

²⁴Ic inon ximoyolotican ica inin tlanahuatili, mihtos ximotlaoshtlacan se huan oc seja quen onanquicactoyahque ic acho. Tla ijcon nanquichihuasque, namehhuan noyojqui nanmosetilisque tehuan Iconetzin huan tehuan in Tohueyitahtzin. ²⁵Huan Jesucristo techcaquiltlohtoc techmacalos in nemilistli nochipa.

26Ijcon namechihcuiluihtoc
ic namechmatilliya in aquin
mechcahcayahuasnequihque.

27Huan namehhuan
nanquipyahque in Itiotonaltzin
Dios, Yehhuatzin in aquin
omechmacaloc in Jesucristo, huan
ijconon ahmo huelica quinequis oc
seya aquin mechnextilis, tleca in
Itiotonaltzin Dios mechnextililos
nochin. Huan nochin inon tlen
mechnextililos in Itiotonaltzin
Dios, nele melahuac inon huan
ahmo istlacatilistli. Ijcon tel,
ximosetilihiyecan tehuan in Cristo,
quen mechnextililo in Itiotonaltzin
Dios.

28Axan tel, notlasohicnihuan,
ijcon ximosetilihiyecan tehuan
in Cristo, matimoyolchicahuacan
ihcuac mohualnextihtzinos
Yehhuatzin, huan ahmo
matimopinatican teixpa
Yehhuatzin ihcuac hualuilohuas.

29Yinanquimatihque quen in
Jesucristo nele tlamelajcan. Ijcon
cuali nanquimatisque nochin aquin
quichihuahque in tlen tlamelajcan,
yehuan tecone huan in Dios.

Tecone huan in Dios

3 Xicchihuacan cuenta
quen Dios Tohueyitahtzin
techtlaoshtlalo. Ijconon cuali
techtocahhuilos titecone huan,
huan ijcon nele ticaten. Ic inon
in tlalticpac tlacamen ahuel
quinehnehuiliyahque quen
tehuanten titecone huan Dios,
tleca yehuan ahmo teixmautoque
in Dios. **2**Notlasohicnihuan,
yititecone huan in Dios huan ayamo
ticmatihque quen tinemisque satepa

queman titeitasque in Totecohtzin
Jesucristo. Huan ticmatihque
ihcuac oc sepa hualuilohuas in
Jesucristo, timochihuasque quen
Yehhuatzin, tleca titeitasque quen
Yehhuatzin ilohuas. **3**Huan nochin
in aquin ijconon mochixtiyesque
ica Yehhuatzin, yehuan
moyolchipahuasque ijcon quen
in Jesucristo Yehhuatzin in aquin
Yolchipahuactzin.

4Tlahtlacolanas in
aquin teyixpanahuiya ica
tetlanahuatiluan in Dios, tleca
yehhua ijcon quixnamaquis inon
tetlanahuatiluan in Dios. **5**Ic inon
yinanquimatihque omochihualoc
tlalticpac tlacatl in Jesucristo ic
techixpohpoluilos totlahtlacol.

Huan Yehhuatzin ahmo
mopiya niyan tlen tetlahtlacol.

6Ijcon tel, nochin in aquin
mosetilihoque tehuan in Jesús
ahmo tlahtlacolantinemihque.
Huan nochin aquin
tlahtlacolantinemihque,
ayamo quinehnehuiliyahque.

7Notlasohicnihuan, ximomaluican
ahmo aquin mamechcahcayahua
ica tlen qui tohua. In aquin
quichihuah tlen cuali, yeh in
aquin tlamelajcan, ijcon quen
Yehhuatzin tlamelajcan. **8**Huan in
aquin tlahtlacolantinemihque,
yehhua in iconeu in ahmo cuali tlacatl,
tleca in ahmo cuali tlacatl yehhua
tlahtlacolantoc den achto. In
Iconetzin Dios ohualuilohuac ic
moxitinilis inon ahmo cuali tlacatl
in tlen quichiutoc.

9In aquin teconeu in Dios ahmo
tlahtlacolantinemihque, tleca quipiya
in emilis quen Dios omomacac.

Huan ahuel tlahtlacolantinemis tleca teconeu in Dios.

¹⁰ Ahmo tequiyo momatis in aquin iconehuan in ahmo cuali tlacatl huan aquin teconeu in Dios. Tleca in aquin quichihua in ahmo cuali huan ahmo quitlasohtla in icniu, yehhua aquin ahmo teconeu in Dios.

Matimotlaoshtlacan se huan oc seja

¹¹ Tel, in itlahtoltzin tlen nanquicactoque den acho yeh inin: quen matimotlaoshtlacan se huan oc seja. ¹² Ahmo matimochihuacan quen Caín, quen yehhua iconeu in ahmo cuali tlacatl huan oquimicti in icniu. Tleca in Caín ahmo cuali oquichihuayaya, huan yeh in ica oquinexicaluiyaya in icniu ica nochin tlen cuali oquichihuayaya. Huan ic inon oquimicti.

¹³ Nocnihuan, ahmo xicnehnehuilcan oc noncuahtic in tla mechcocoliyahque in tlalticpac tlacamen. ¹⁴ Tehhuanten ayacmo timquisque tleca yoticahsihque in nemilstli nochipa, huan ticmatihque inon tleca tiquintlaoshtlahque tocnihuan. In aquin ahmo quitlasohtla in itlacaicniu ayamo quipanahuhtoc in miquistli.

¹⁵ Nochin aquin quicocoliya se itlacaicniu, inon se temictiyani. Huan ic inon nanquimatihque niyan se temictiyani cuali quiyiya in nemilstli nochipa. ¹⁶ In Jesucristo otecnextililoc tlen nele tlaoshtlalistli ihcuac omicohuac topampa, huan ijcon noyojqui tehhuanten ticpiyahque tlen timotemacasque inuan tocnihuan. ¹⁷ Huan tla seja ahmo tlen

quipolohua, huan tla quita in oc se itlacaicniu quipolohua, huan ahmo ica tlocoya, ahmo nele tetlasohtla in Dios. ¹⁸ Notlasohicnihuan, ahmo san ica totlahtol matimotlaoshtlacan. Tlahmo tlamelajcan matimotlaoshtlacan ican tlen ticchihuasque.

Ximoyolchicahuacan teixpa in Dios

¹⁹ Ijcon tel, tla nele timotlaoshtlasque, tictmatisque ic nele tehhuan titlamelajcan huan ahmo tlen techyoltzacuiliya teixpa in Dios. ²⁰ Huan queman toyolo techtlahlacoltis ica itlahtlen, Dios ocachi momati quen tehhuan tleca Yehhuatzin momati nochin. ²¹ Ijcon tel, notlasohicnihuan, in tlahmo techtlahlacoltis toyolo, ahmo timomoutisque tleca ticmatihque niyan ahmo techtlahlacoltilos in Dios. ²² Huan Yehhuatzin techmacalos nochin tlen titetlahtlanilisque, tleca tictlacamatihque nochin tetlanahuatil in Dios huan ticchihuahque nochin tlen monequi. ²³ Huan otechtequiutiloc maticneltocacan ipan Iconetzin Jesucristo huan matimotlaoshtlacan se huan oc seja. ²⁴ In aquin quitlacamatihque tetlanahuatiluan in Dios mocahuahque tepa Yehhuatzin, huan Yehhuatzin mocahualo inyolihtec. Ticmatihque Yehhuatzin mocahualo toyolihtec, tleca Yehhuatzin in Itiotonaltzin in Dios mocahualo toyolihtec.

In Itiotonaltzin Dios huan itonal in ahmo cuali tlacatl tlen teixnam quis in Cristo
4 Notlasohicnihuan, ahmo xicneltocacan nochten

inohque aquin quihtosque mocahualo inyolihtec in Itiotonatzin Dios. Ijcon xiquistlacaahsican tla nele melahuac noso ahmo. Ipan in tlalticpactli caten miyacten istlacatcamen aquin quihtosque: “Tehhuan titetlanonotzaluan in Dios.”² Huan ijquin cuali nanquistlacaahsisque in tla melahuac quipiya in Itiotonatzin Dios. Nochin in aquin quichipahuasque teca Jesucristo quen ohualuilohuac ic nele quen tlalticpac tlacatl, yehhuan in aquin inyolihtec mocahualo in Itiotonatzin Dios.³ Huan in aquin ahmo quichipahua ijcon teca in Jesús, ahmo mocahualo iyolihtec in Itiotonatzin Dios. Oc noncua mocautinemi yolihtec itonal in tlaixnamiquini. Yeh in tlen ic teixnamiqui in Cristo. Yinanquicactoque namehhuan quen hualas inon tlaixnamiquini teca in Cristo, huan axan yinentinemi itonal ipan in tlalticpac.

⁴ Notlasohicnihuan, namehhuan ic nele nantehuaxcahuan in Dios, huan yinanquintlantoque inon istlacatcamen. Tleca Yehhuatzin aquin mocahualo namoyolihtec ocachi chicahuac quen in oc seja in aquin mocahua inyolihtec yehhuan tlalticpac tlacamen.⁵ Yehhuan ic nele san tlacamen den tlalticpactli, huan ic inon tlahtohuahque yehhuan ica in tlamachilistli den tlalticpac, huan in oc sequin tlalticpac tlacamen ocachi quincaquihque.⁶ Huan tehhuanten titehuaxcahuan in Dios. Techcaquisque in aquin

teixmatihque in Dios. Huan in aquin ahmo tehuaxca in Dios ahmo techcaquihque. Ijcon tel, cuali tiquixmatisque in aquin mocahualo inyolihtec in Itiotonatzin Dios tlen tlamelajcan, huan noyojqui tiquixmatisque in aquin mocahua inyolihtec in itonal in tlacahcayauqui.

Dios Yehhuatzin in Tlasohtlalistli

⁷ Notlasohicnihuan, ticpiyahque tlen timotlasohtlasque se huan oc seja, tleca in tlasohtlalistli huitz tepa in Dios. Nochin in aquin quitlasohtlahque itlacaicniu yehhuan tecone huan in Dios huan teixmatihque in Dios.⁸ Huan in aquin ahmo quitlasohtla itlacaicniu ahmo teixmautoc in Dios, tleca Dios quintlasohtlalo nochin tlacamen.⁹ Dios otechnextililoc tetlasohtlalis ica tehhuanten, ic otehualtitlaniloc in Teconetzin seja nican tlalticpac ic maticpiyacan nemilistli nochipa teca Yehhuatzin.¹⁰ Xicchihuacan cuenta quen otechtlahtlaloc in Dios. Otechtlahtlaloc masque ic achto ahmo otitetlahtlahque. Ic inon otehualtitlaniloc Teconetzin ic mamicohua ica totlahtlacol.

¹¹ Notlasohicnihuan, in tla Dios ijcon otechtlahtlaloc, tehhuanten noyojqui matimotlasohtlakan se huan oc seja.¹² Huan masque ahmo aquin teitztoc in Dios, in tla timotlasohtlasque se huan oc seja, Dios mocahualo toyolihtec. Huan ijcon nele titetlahtlahque in Dios queman timotlasohtlasque se huan oc seja.¹³ In Dios otechtloco liloc Itiotonatzin huan ic inon tiematihque quen

timocahuahque totech Yehhuatzin Dios huan Yehhuatzin mocahualo toyolihtec.¹⁴ Huan tehhuan aquin titetiotlatitlaniluan titeitztoque huan ticchipauticaten quen in Tohueyitahtzin otehualtitlaniloc Iconetzin ic quinmaquixtilos in tlalticpac tlacamen.¹⁵ San aquin quichipahua quen Jesús Iconetzin Dios mocahua tepa in Dios huan Yehhuatzin mocahualo iyolihtec.

¹⁶ Ijconon ticmatihque huan ticneltocahque quen Dios techtlasohtlalo. In Dios molui techtlasohtlalo huan in aquin molui tetlasohtla mocahua tepa in Dios, huan Yehhuatzin Dios mocahualo iyolihtec.¹⁷ Ijconon moscaltiya in tlaoshtlalistli tlamelajcan toyolihtec, ahmo matimomoutican teixpa in Dios ipan in tonali den tlrixcomacalistli. Huan ijcon quen techtlasohtlalo, no ijcon quimonequiltiya in Dios matimotlasohtlacan nican tlalticpac.¹⁸ Queman quimati seja quen quitlasohtlalo in Dios, ayacmo momoutiya. In tlahmo ijcon, in tlaoshtlalistli melahuac quiqxitiya in moucayotl, tleca in aquin quimati ica tetlasohtlalis ayacmo momoutiya ica in tlapanolistli. Ic inon in aquin quipiya moucayotl ayamo quimati tla molui quitlasohtlalo in Dios.

¹⁹ Tehhuanten titetlasohtlahque in Dios tleca Yehhuatzin otechtlasohtlaloc achto.²⁰ Huan cana seja quicocoliya se itlacaicniu aquin ayacmo quitasnequi, huan quihtos: “Queme nitetlasohtla in Dios.” Huan ijcon san teca tlahtohua. Ahmo nele tetlasohtla

in Dios aquin huehca ilohuac, tleca ahmo quitlasohtla itlacaicniu aquin inahuac.²¹ Yehhuatzin techmacalotoc inin tlanahuatili; in aquin tetlasohtla in Dios noyojqui quipiya tlen quitlasohtlas in itlacaicniu.

Yotictlanque ica in achto tlanehnehuilistli

5 Nochin in aquin quineltocahque quen Jesús Yehhuatzin in Cristo Tetlapehpeniltzin in Dios, yehhuan teconehuan in Dios. Huan aquin tetlasohtlas Tohueyitahtzin noyojqui quintlasohtlas inon teconehuan.

² Tla nele titetlasohtlahque in Dios huan ticchihuahque in tlen Yehhuatzin quimihtaluiya, ticmatihque noyojqui tiquintlasohtlahque tocnihuan aquin noyojqui in teconehuan Dios.³ Tla nele titetlasohtlahque in Dios, ijcon tictlacamatisque in tetlanahuatiluan, huan inon tetlanahuatiluan ahmo tequin chicahuac.⁴ Tleca nochin in aquin teconehuan in Dios ayacmo quipixtoque in achto tlanehnehuilistli. Ijcon queman titlaneltocasque, techmacalos in Dios techicahualis ic tictlanisque inon achto tlanehnehuilistli.

⁵ In aquin quimati quen in Jesús Yehhuatzin in Iconetzin Dios, san yehhua cuali quitlanis ica in achto tlanehnehuilistli.

In chipaucatlahtoli teca in Iconetzin Dios

⁶ Ihcuac oilohuaya tlalticpac, in Jesucristo omocuatequiloc ica atl huan

oyesquixohuac ic omicohuac. Ahmo san omocuatequiloc, tlahmo noyojqui nele omicohuac, huan oyesquixohuac.
7 Huan noyojqui oquichipahualoc in Itiotonatzin Dios quen Jesucristo nele Teconetzin in Dios. Huan tlamelajcan in Itiotonatzin Dios.
8 Ica yiyi tlahtoli ticmatihque in Jesucristo nele Teconetzin Dios. Achtó yeh in tetlacuatequilis huan ic oupa yeh quen omicohuac. Huan ic yexpa ijcon otechiluiloc in Itiotonatzin Dios. Huan inon yiyi tlahtoli ijcon ixnamictihtoc in Jesucristo nele Teconetzin Dios.
9 Ticneltocahque in tlachipaucatlaholti den tlacamen, huan ocachi huelica tincneltocasque tettlachipahualis in Dios. Tleca yotechiluiloc in Dios quen in Jesucristo, Yehhuatzin Teconetzin.
10 In aquin quineltoca teca in Iconetzin Dios quiyolnehnehuiliya in tlen melahuac. In aquin ahmo quineltoca techipahualis in Dios, yeh quihtosnequi istlacati teca in Dios, tleca ahmo quineltoca in tlen Dios mihtohtoc ihcuac oquichipahualoc teca Teconetzin.
11 Huan ijcon omiho in aquin oquichipahualoc. In Dios techmacalotoc in nemilistli nochipa, huan teca Teconetzin timosetilihque.
12 Tla mocahualo iyolihtec seja in Iconetzin Dios, yeh quipiya in nemilistli nochipa. Huan in tlahmo mocahualo yolihtec in Iconetzin Dios yeh in aquin ahmo quipiya in nemilistli nochipa.

Ic quitlamiltya ica in cuali tlahtoli

13 Namechihcuihuiya inin tlahtoli ica namehhuan aquin nanteneltocahque teca Teconetzin Dios, ic maquimatican quen nele nanquihiyahque in nemilistli nochipa.
14 Huan titetemachiyahque teixpa in Dios. Tla timotlatlautisque

ica itlahtlen, ticmatihque nele techcaquilos tla titetlatlautisque ica tetlamatiyan Yehhuatzin.
15 Huan tla ticmatihque quen techcaquilos in Dios, noyojqui ticmatihque quen techchihuililos in tlen titetlatlautiyahque.

16 Tla ticmatihque tlahtlacolantoc se tocniu tlaneltocani, ticpiyahque tlen timoyolmachtisque maquitlapohpoluilo inon tocniu. Huan in tlahmo tlahtlacolantoc ic miquis, ic inon in Dios motzacuivilis ayacmo matlahtlacolana huan ijcon manemi. Huan oncan in tlahtlacoli ic tlen miquis seja, huan ahmo niquihtohua tla quitlaihtlaniya ica in aquin ijcon oquichiu.
17 Nochin ahmo cuali tlen quichiutinemi in tlacatl, yeh in tlahtlacoli, huan ahmo nochin tlahtlacoli tlen ic miquis seja.

18 Ticmatihque in aquin teconeui in Dios ahmo tlahtlacolantinemi, tleca in Iconetzin Dios quehualo huan in ahmo cuali tlacatl ahhuel tlen quichihiuiliya.

19 Ticmatihque tehhuan titeconeuhan Dios, huan in oc sequin in tlalticpac tlacamen quintlacamatiltiya in ahmo cuali tlacatl.

20 Ticmatihque noyojqui quen Iconetzin Dios ohualuilohuac huan yotechtlamatiltiloc matiteixmatican in Dios tlamelajcan. Timocautoque totech in aquin tlamelajcan Yehhuatzin Iconetzin Jesucristo. Yehhuatzin in Dios tlamelajcan, huan techmacalos in nemilistli nochipa.
21 Notlasohicnihuan, ahmo xictemachican ica tlen quitexelosnequi in Dios.